

經世為大司憲姜碩期為應教姜大進為掌令金堉為持平李景義為文學○
夜一更南方有氣如火光自二更至四更東方坤方有氣如火光○辛未令諸
道團束軍兵以備西虞都體察使張晚啓曰目今冬節已深江水既合在我之
備所當日新整頓以待敵之必至今年則兵使不必進駐境上各在本營團束
所領之兵朝聞令而夕發俾無後至之患咸鏡南道之兵則分為二起一半虞
候為先領進一半兵使為後起繼援宜當下諭此意於各道何如從之○夜
一更流星出中台星下八艮方五更流星出北河星下八乾方○壬申上行
賀至望闕禮○癸酉右贊成李貴上劄論仁城之罪無斥臺諫之不言大司諫
李榮司諫尹煌獻納金世濂正言李景曾啓曰當初珙之被罪也舉朝力爭而
後僅得蒙允公議所在斷不可饒而今因仁興一疏遽爾放釋臣等所當舉法
論列請收成命而但母子之間死生之際情有所不忍故聖教懇到字字惻
怛實出於天理人情之至凡在聞見孰不感動大臣亦舉公義私恩將順聖
意之不暇臣等亦欲體殿下之心而成殿下之美也臣等非不知珙二年
之謫不足以懲其罪犯而因茲放釋使之悔悟以開自新之路固是聖世事
也况不念舊惡屈法伸恩亦帝王惇叙之一道也臣等之意不過如此而已右